

Pregunta di **reflexion y discusion** pa compaña e coleccion di storia **Bo cuenta! 5 chick y 5 guy mescos cu bo** di Lorena Boekhoudt-Almary:

E chicknan

Storia 1 *Luci kier renchi den nanishi*

1. Kico ta e plan di Luci pa logra su meta?
2. Dicon Luci no ta protesta pa bay misa e biaha aki?
3. Con Luci y su mama ta comunica cu otro tocante loke a pasa? Tin bentaha pa 'papia' di e forma aki? Menciona algun.
4. Kico ta Luci su argumentonan? Bo ta di acuerdo cu ne, of cu e mama?
5. Cuanto tempo ta pasa, di cuminsamento di e storia te na final?
6. Bo lo prefera di haci un piercing na un luga profesional of laga bo amigo/a hacie?

Storia 2 *Cindy tin cu wak pa su ruman*

1. Bo tin comprension pa loke Cindy a haci? Pakico si, of pakico no?
2. Kico bo ta kere cu Cindy por a haci otro pa haya un solucion?
3. "Ki clase di responsabilidad bo tin, Cindy?", e mama ta puntra (mira pagina 23). Den bo opinion, tin mas hende cu ta responsabel den e situacion aki?

Storia 3 *Samara ta bay cine*

1. Samara su mayornan ta dun'e suficiente atencion? Menciona 2 argumento pa sostene bo pensamiento.
2. Ki pelicula e gang ta dicidi di bay wak porfin?
3. Kico ta e sorpresa desagradabel cu Samara ta haya na cine?
4. Kico bo ta kere por ta un motibo pa tanto gañamento den un famia?

Storia 4 *Un guy pa Sheila*

1. Dicon hende ta pensa cu Sheila ta un 'nerd'?
2. Hende tin un tendencia di hinca otro den categoria (p.e. 'nerd'). Kico bo opinion ta di esey?
3. Kico bo ta haya di e sugerencianan di Sheila su amiganan pa su transformacion?
4. Al fin al cabo, tabata necesario pa Sheila transforma su apariencia? Dicon si, of dicon no?
5. Kico ta e mensahe tras di e storia di Sheila?

Storia 5 *Suyen kier un baby*

1. Na unda e storia aki ta tuma luga?
2. Cuanto aña Suyen tin?
3. Suyen su ruman ta haya yiu. Joanne ta haya hopi atencion y Suyen “... ta haya henter e asunto aki un poco ridiculo.” (pagina 41) Dicon bo ta kere Suyen ta reacciona asina?
4. Kico bo ta haya di Chris su reaccion riba e proposicion di Suyen? Dicon bo ta kere Chris a bay di acuerdo pa haya un baby cu Suyen?
5. Kico a pone Suyen cambia di idea na final di e cuenta?

E guynan

Storia 1 *E secreto di Mike*

1. Mike tabata un mucha popular na scol? Dicon si, of dicon no?
2. Kico ta Mike su secreto? Bo a spera cu esey lo tabata su secreto?
3. Ki nomber Mike a duna su garoshi? Pakico Mike ta pensa cu esey ta e nomber ideal?
4. Ken ta Mike su competencia mas pisa?
5. Mike no a gana medaya, pero el a gana algo hopi mas grandi. Kico bo ta kere esey ta? (Por menciona mas cu 1 cos!)

Storia 2 *Riki ta un scout*

1. Ki honor Riki ta haya en conexion cu Dia di Himno y Bandera?
2. Ki sorpresa desagradabel Riki ta topa cu ne e weekend di e campamento?
3. Riki ta menciona un storia di e spirito di Rooi Prikichi. Storia asina ta ehempel di *literatura oral*: cuenta cu ta bay di un boca pa otro, pero no ta skirbi ningun caminda. Bo conoce storianan asina, anto di spirito, cu ta tuma luga na Aruba? Conta bo amigonan, pa asina sigui cu e tradicion bunita aki!
4. Den e storia di *Riki ta un scout*, por resumi e storia den un dicho conoci na Ingles! Abo sa cua esaki ta? (**Tip**: e palabra ‘buki’ ta aden ...)

Storia 3 *E timides di Rob*

1. Rob ta gusta Luci. Bo ta reconoce e personahe di Luci cu su malasuerte for di un otro storia den e buki aki? Cua storia?
2. Cua ta e tattoonan cu Rob tin?
3. Kico ta Rob su dilema?
4. Ken ta e experto cu por yuda Luci na final di e storia y dicon?
5. Den bo opinion, kico ta algun manera aceptabel pa acerca un hende cu bo ta gusta? Discuti cu otro!

Storia 4 *Luis ta bay fiesta na lama*

1. Bo por menciona 5 manera cu Luis su gordura tabata molestie na scol basico?
2. Loke e muchanan tabata bisa Luis ta corecto? Dicon si, of dicon no?
3. Luis a bisa Zinia cu e no gusta lama y cu e no gusta ora tin hopi hende. Pero e no a bisa *dicon*. Bo ta kere el a haci bon? Splica bo mes.
4. Na prome instante Luis no kier kita su shirt na lama: miedo cu hende ta bay tent'e atrobe. Zinia y su amiganan no ta insisiti pa e kita su shirt y tampoco nan ta duna comentario. Kico mas Zinia ta haci pa pone Luis sinti safe pa e bay pasa pret cu e otronan?
5. Kico abo por haci pa laga otro hende sinti nan mes safe cu bo? Por ehempel na scol, ora di sali den grupo, of na bo cas?

TIP: Bo palabra tin peso! Manera nos a wak den e storia aki, den un frega di wowo nos por bisa cos cu por haci otro dolor. Despues nos no por tum'e bek, pero e daño si ta keda. Aunke por tin hende rond di nos cu ta haci esaki sin pensa - y kisas tur dia - anos no tin nodo di ta manera nan! Nos semper tin e opcion pa scoge nos palabranan conscientemente.

Un triki ta, pa no reacciona mesora riba algo cu otro hende ta bisa, pero pensa un rato prome cu bo papia. Puntra bo mes: *mi ta uzando mi palabranan pa bon?* Un par di seconde prome cu bo ta bisa algo, laga bo intencion positivo guia bo. Y si bo no por pensa nada bon ... miho no bisa nada!

Storia 5 *Josh, sinta riba bo blaar!*

1. Kico ta Josh su les favorito?
2. Den bo opinion e titulo ta pas cu e storia? Dicon si, of dicon no?
3. Con Josh su relacion cu su ruman homber grandi ta?
4. Segun Josh mes, e no ta un 'player' di berdad. Den bo opinion, su comportacion ta refleha esaki? Con Liam ta yama Josh? (Palabra na Papiamento pa 'player'!)
5. Dicon Josh a haci loke el a haci? Kico e por a haci otro pa logra su meta, sin hunga cu e sintimientonan di otro hende?
6. Jadah a expresa su disgusto uzando mas cu djis su palabranan! Bo ta di acuerdo cu loke el a haci? Dicon si, of dicon no? Discuti esaki cu otro!

Cua di e storianan bo a gusta mas? Dicon?

Tur storia den e buki tin un dilema of problema!

Bo mes a yega di pasa den un of mas di e dilemanan aki?